

lis Gnovis

UDIN. Messe par furlan

A Udin, la Messe par furlan e ven cjantade sabide ai 5 di Avrîl, aes 5 e mieze sore sere, li de capele «de Puritât», daprûf dal Domo. Radio Spazio le trasmet sul moment.

UDIN. Culumie circolâr pes capsulis di caffè

In principi, che al fos caffè di chel vèr o di vuardi (cence dismenteâ chel di cicorie), par fâlu si meteve la polvarine te aghe bulinte, si lassave fer dut par un moment e po si passave cuntun colin, e il struc magari no lu si butave vie, ma si lu meteve te tiere pes plantis. Daspò e je rivade la napoletane, che bisugnave, cuant che la aghe e vignive fûr de valvule, zirâle par che la aghe e vignis jù, e po dopo la ultime invenzion de moche che o doprin ancjemò in di di vuê. Ma, pe comoditât che simpri o cirin, e je vignude fûr ancje une machinute che tu metis dentri une capsule, tu frachis un boton e al ven fûr il caffè. Comut. Ma dopo tu scuegnis proviodi a smaltri lis capsulis. Nuie pôre: a Udin a àn presentât un progjet par ufrî ai citadins che a doprin chestis machinutis, un sisteme pal recupar des capsulis di plastiche cun dentri ce che al è vanzât, che po dopo al vignarà recuperât: si clame culumie circolâr. Bon, ma atents, che masse capsulis di caffè no fasin ben ae salût.

TARVIS. Il cjant dal gjal di mont

Se il leon al è il re de foreste africane, il re des forestis des Alps, tra i uciei, al è di sigûr il gjal di mont, che di primevere fin ai prins dal mês di Mai al fâs une fadie mostre cui siei cjants di amôr, par cîri di tirâ dongje une femenute che i tegni un pôc di compagnie. E al è, mighe par dibant, ancje il simbul de foreste di Tarvis, ma ancje dai ecosistemis di mont di dut il Friûl, che di un pôcs di agns al sta diventant simpri plui sclagn di numar, cussì che vuê al ven considerât come vulnerabil, categorie in estinzion. Par chest si è pensât di metilu a pupil dentri di une ativitât di osservazion, che e sarâ coordinade a nivel regionâl de Forestâl nostrane. Viodarin i risultâts, sperant che chei che a van in mont a puedin ancjemò sinti il so cjant, che lui no si lasse di sigûr svicinâ par un “selfie”...



TUMIEÇ. Masse colomps

Masse colomps, in chescj ultims timps, a àn cjapade citadinance a Tumieç. E il probleme al sta dant bieî fastidis a chei altris citadins, e ai publics aministradôrs comunâi che a scuegnin fâ front a cheste sorte di emergjence publiche. Si jere proviodût a dâur di mangjâ mangjative cun antifecondatîfs, ma fin cumò nol è bastât, come che no je bastade une ordenance dal 2022 che e improibis di dâ di mangjâ ai colomps e nancje il vè metût spirons ator dai cuvierts des cjasis, che tant lôr a van a metisi tes bandis no spironadis. E no àn rispiet nancje pe autoritât, che a àn cjatât acet ancje in municipi, lassant par tiere guano e sporc, che bisugne netâ. E po a puartin ancje tantis malatiis. E nol è facil di mandâju vie in altris manieris, parcè che bisugne tignî cont ancje des leçs, par la cuâl, prime di passâ a une azion di contigniment, la normative e stabilis come condizion di risi la presince di 300/400 esemplârs di uciei par chilometri cuadrât. Cussì, se o viodês tal centri storic di Tumieç tancj di lôr cul nâs in sù pal cîl, o savêš che a stan contant i colomps cun atenzion, parcè che nol vâl contândi un par dôs voltis.



La Plêf di Sant Pieri a Zui

Miercus 2	S. Francesc di Paola	Domenie 6	V Domenie di Cuaresime
Joibe 3	S. Ricart	Lunis 7	S. Zuan Batiste
Vinars 4	S. Isidôr di Sivillie	Martars 8	S. Redent
Sabide 5	S. Vincenç Ferrer	Il timp	Zornadis bielîs.

 Il soreli Ai 2 al jeve aes 6.45 e al va a mont aes 19.37.	Il proverbi Il miôr cussin e je la cussience nete. Lis voris dal mês Cul mês di Avrîl o sin bielzà in plene Vierte, che come ogni an nus permet di semenâ o riplantâ tal ort ogni sorte di verdure e di ortaie.
 La lune Ai 5 prin cuart.	

Nassite di “Iulium Carnicum”

A e fin, al po ancje sucedi che un país al puedi nassi par vie de dibisugne – o fevelin di timps antîcs – di difindi miôr un teritori di une presumude invasion, come che al jere sucedût cu la costruzion de fuartece di Palme. Al jere sucedût che la Serenissime e veve conferît a Juli Savorgan di Osôf, cjapitani des sôs miliziis, di costruî a Palme une fuartece par difindi Vignesie dai Turcs che, dut câs, no si faserin viodi propit par nuie. E se magari a cheste preocupazion si zonte il voli lunc di un strateghe, che i ven iniment di progjetâ une rêt di citadinis fuartificadis par meti in sigurece un teritori concuistât, ma malsigûr, di cualchi bande dai siei confins. Met ancje che si tratî di un proconsul roman di non Caius Iulius Caesar, alore si pues pensâ che al puedi tratâsi de fondazion dal “Municipium” di Iulium Carnicum, che nô vuê o clamìn Zui, parcè che o sparagnin ancje su lis peraulis. Il proconsul, di fat, che al veve la responsabilitât pai teritoris de Galie Cisalpine, nol lave mai ator par chês bandis par dibant. Cussì, tor dal 54 p.d.C., doi agns passâts de scorsonade di une tribù dai Gjepits, che e veve fiscât la citât di Aquilee e ancje altris teritoris, il proconsul che o vin dit al veve fat un sorelûc ta chei teritoris, scomençant a meti sù une rêt di citadinis fuartificadis – che in chês volte si clamavin “oppida” – di mût di difindi dal nord al est un teritori cence difesis militârs, teritori che Rome e veve concuistât e che e voleve tignilu sot dal so control. Ve che al è propit cussì che al pues jessi nassût ancje Iulium Carnicum, o ben Zui. Po, si sa, dal moment che tu cjatis simpri cualchidun che nol è dacuardi cun chel che a pensin chei altris, e viodût che o sin simpri tal fum des ipotesis, po stâi ancje che la edificazion di Iulium Carnicum e vadi puartade un pôc

Il puest, tal cjanâl di Sant Pieri, cemût che lu clamìn a vuê, o cjanâl de Bût, i Romans dal voli lunc lu varessin olmât di bot, par vie de sô posizion strategjiche

plui indenant, al 27 p.d.C., ai timps dal imperadôr Otavian o, se si vûl scoltâ cualchi altri bastian contrari, ancjemò plui indenant. Il puest, tal cjanâl di Sant Pieri, cemût che lu clamìn a vuê, o cjanâl de Bût, i Romans dal voli lunc lu varessin olmât di bot, par vie de sô posizion strategjiche: une alture, che vuê e ten ancjemò di cont la antighe plêf di Sant Pieri, dulà che si metin adun dutis lis crôs astîls des glesiis de valade de Bût, un timp sogjetis ae diocesi di Iulium Carnicum, pal rît antigon de bussade des crôs. Di là sù il voli al comande su dute la valade de Bût, fie dal Tiliment, che il so jet al jere dutun cu la strade che e menave, pal pas di Mont di Crôs, tal Noric. Al timp che o fevelin, si pues pensâ che su di chês alture i Romans a vebin fat sù un “castrum”, un campament fuartificât cuntun puest di avistament e di control. Po, da pît, pôc lontan de Bût, a faserin sù ancje un abità, e ancje chest fuartificât, che al diventâ il

“Municipium” plui a nord di dute la Italie romane. Ma no si trattave mighe di un blec di tiere: il “Municipium” di Iulium Carnicum al tignive a sotet tancj país dal Friûl di chês volte e al paronave fin sul Cjadovri. I siei abitants a jerin pe massime part Celts de tribù dai Cjargnei, che la lôr divignince no je scrite di precis te storie, e che intun timp passât a logavin tal sît di un cjastelîr protostoric, cetant prime che a rivassin i Romans. Ma cu la fondazion di Iulium Carnicum, ta chel “Municipium” che za al gjoldeve di une cierte autonomie aministrative - che il voli di Rome al jere un pôc lontan - a rivarin tancj altris di lôr, massime marcjadants, par gjoldi des occasions di vore e di vuadagn che Iulium Carnicum al ufrive: un puest vivarôs e siôr, che al vuadagnâ ancje il titul di “vicus” o ben centri civil aministrât di une magistrature sô proprie, che lis sôs testimonanceis lis cjatais tal Museu archeologic.

Roberto Iacovissi

Peraulis in dismentie

par cure di Mario Martinis

> AVODÂSI

v. = votarsi a, consacrarsi
(dalla forma denominale avòt, vòt, come nell’italiano antico avvotare, continua probabilmente il nome votum ‘promessa solenne; preghiera; offerta; augurio’, dal participio passato del latino vovere ‘consacrare in voto, promettere, dedicare’)
Te disgrazie Albe si è avodade a Sant Antoni.
Nella disgrazia Alba si è dedicata a Sant’Antonio.

> AVUÂL

prep. e avv. = uguale
(dal latino aequalis ‘eguale’)
Ancje tu tu sès avuâl di lui.
Anche tu sei uguale a lui.

> BABAN

s.m. = sciocco, babbeo, babbiano
(dalla base italiana onomatopeica bab- ‘chiacchierare’)
Va là che tu sès un baban!
Va là che sei uno sciocco!

> BABIO

s.m. e agg. = bravaccio; scaltro
(forse dal latino tardo babulus ‘millantatore, fanfarone’)
Al è babio, che no si po scherçâ cun lui.
È scaltro, con lui non si può scherzare.

> BAFE

s.f. = mezzina di lardo
(dalla radice onomatopeica *baff-, indicante ‘qualcosa di gonfio e denso’)
Va inte cjanive e taie un toc de bafe di ardiel.
Vai in cantina e taglia un pezzo della mezzina di lardo.

> BALFUERIE

s.f. = bravata
(dal verbo barufâ ‘abbaruffarsi’, forse con la trasformazione di r in l)
Jacum nol è un di balfuerie.
Giacomo non è tipo da bravata.